

四庫全書

集部

# 欽定四庫全書

集部

劔南詩橐卷三十六

詳校官庶吉士臣陳若霖

主事臣呂雲棟覆勘

總校官檢討臣何思鈞

校對官修撰臣戴衢亨

謄錄監生臣楊浚明

欽定四庫全書

劔南詩藁卷三十六

宋 陸游 撰

九里

破曉憑鞍野興濃  
鷺飛先我過村東  
綠鍼細細稻浮水  
絳雪紛紛花舞風  
陌上鞦韆喧笑語  
擔頭鉅杓簇青紅  
誰知老子裴回意  
絕愛山橫淡靄中

清明

氣候江吳異清明乃爾寒老僧丘墓感貧苦道途難燕  
子家家入梨花樹樹殘一春回首盡懷抱若為寬

一百五日行

一百五日東郊時陂塘水滿雨如絲人家青煙不禁火  
俚俗豈復思子推舊墳年多木已拱新墳積土高纍纍  
老鴉飛鳴銜肉去紙錢雨溼挂樹枝深松茂柏死自樂  
地下應笑生人悲眼中青山身後塚此事決定君何疑  
風吹雲破日下照小灘碎礫光陸離停車暫憩道傍舍

解囊且補殘春詩

送李憲被召舊與其先侍郎遊從

早靄龍門鬢未秋  
算年乃復接英遊  
海瀕已幸見公子  
瓜壘仍煩訪故侯  
霖雨即陪諸老進  
德星肯為一方留  
西城柳色青如許  
欲挽長條特地愁

初夏

已過浣花天  
行開解粽筵  
店沽浮蠟酒  
步樣載秧船  
古俗交情久  
豐年樂事偏  
出波尊菜滑  
上市鱖魚鮮  
僧閣

梅山麓漁扉禹廟墻丹青不可畫得句一欣然

幽居

社結山林友家藏種樹書蔽牀欣卜宅容駟笑高閭薄  
飯頻茹韭單衣旋製練東家借蹇罷南市買船初美景  
遊俱遍鄰翁好不疎時時得乘興豈獨愛吾廬

閒適

朝讀易一卦時鈔史數行花開聊把酒睡起獨焚香寂  
寂市聲遠悠悠村日長吾衰尚何恨兒女解耕桑

病中夜賦

客如病鶴卧還起燈似孤螢闔復開  
首宿花催春事去梧桐葉送雨聲來  
滎河溫洛幾時復志士仁人空自哀  
但使邊塵一朝靜此身不恨死蒿萊

閒身

炊煙漠漠閉柴荆聊用閒身答太平  
重碧飛觴心未老硬黃臨帖眼猶明  
吳蠶滿箔含桃熟攏麥登車搏黍鳴  
補劓息黥今有地問君何處用虛名

書感

奪璧元知價不離屠龍誰信本無求  
哦詩聲裏歲時速憂國淚邊天地秋  
已欠謝安俱泛海況無王粲與登樓  
此身著處憑君記萬里煙波沒白鷗

衰病

衰病集餘日推移成老翁衡門隱者趣  
大布古人風几杖呻吟裏山川莽蒼中  
從來世緣薄不是坐詩窮

雜題



少談王霸謀身拙晚好詩騷學道疎賴有一籌差自慰  
閉門不作子公書

又

莫笑花前白髮新宣和人醉慶元春何時道路平如砥  
却就清漪整幅巾

又

三生元是出家人一念差來墮薦紳二寸楮冠雙草屨  
天公還我水雲身

又

黃庭兩卷伴身閒  
盤篆香殘日未殘  
泛泛孤身似萍葉  
始知天地不勝寬

又

年華偃蹇留不住  
鬢雪縱橫耘更多  
樂天不生夢得死  
恨無人續竹枝歌

又

年來世事掃除盡  
猶有閒吟頗自奇  
安得陟釐九萬箇

為君盡寫暮年詩

自傷

朝雨暮雨梅子黃東家西家鬻蘭香白頭老鰥哭空堂  
不獨悼死亦自傷齒如敗履鬢如霜計此光景寧久長  
扶杖欲起輒仆牀去死近如不隔牆世間萬事俱茫茫  
惟有進德當自強往從二士餓首陽千載骨朽猶芬芳  
雨後絕涼偶作

槐陰日色薄桐葉雨聲長林下有餘適城中無此涼浮

瓜寒水碧斲藥小鉏香未許陶潛達華簪何足忘

陶詩云聊

用忘

華簪

村居

黍酒濃浮瓮瓜瓞綠映盤老便藜粥美病喜粟漿酸紗帽新裁穩絕袍舊製寬村居亦何好聊用發詩端

久雨

水長平侵岸雲低半失村菰蒲亂鳬鴨泥潦困雞豚弄筆排孤悶煎茶洗睡昏荒郊多狗盜及早閉柴門

七十三吟

七十三年事事新  
涵濡幸作六朝民  
髮無可白方為老  
酒不能賒始覺貧  
末路已悲身是客  
此心猶與物為春  
柴門勿謂常岑寂  
時有鄉鄰請藥人

會稽

海近風雲惡  
城高鼓角雄  
山川橫慘淡  
樓閣半虛空  
故國千年鶴  
征途萬里蓬  
餘生猶樂日  
盡合付杯中

泛舟

山照澄波髮鬢青  
新蒲梢上立蜻蜓  
孤舟每為尋詩出  
輸與漁翁醉不醒

夜觀子虞所得淮上地圖

閉置空齋清夜徂  
時聞水鳥暗相呼  
沙塵漫漫連淮潁  
淚盡燈前看地圖

水村

家住烟波似畫圖  
殘年不復歎頭顱  
深深竹塢見螢度  
翳翳菰叢聞鳥呼  
十里笳聲上雲漢  
一空星影落陂湖

天公著我非無地却悔從來錯怪渠

題菴壁

萬里東歸白髮翁閉門不復與人通  
綠樽浮蟻狂猶在

黃紙棲鴉夢已空薄技徒勞真刻楮  
浮生隨處是飛蓬

湖邊吹笛非凡士儻肯相從寂寞中

每風月佳夕輒有  
笛聲起湖之西南

莫知何人意  
其隱者也

又

俠氣當年蓋五陵今成粥飯在家僧  
身存但倚貧非病

齒落方慚豁可憎  
踏月閒穿雙草屨  
聽琴橫按一枯藤  
年來萬事都經遍  
強笑看人獨未曾

晚歸舟中作

路入芙蓉浦  
家依擺柳村  
急灘雙鷺立  
平野萬鷗翻  
市散人爭渡  
僧歸寺掩門  
淒涼誦新句  
招得欲殘魂

送嚴居厚棄官歸建陽溪莊

曼容不過六百石  
淵明僅留八十日  
寥寥千載有兩公  
海內至今推絕識  
放翁貪祿老始歸  
自今不作一錢直



見人勇退輒欣慕亟欲起拜忘衰疾吾廬近在官道傍  
門外未掃車馬迹溪莊有地肯見分會結茅齋傍青壁  
次朱元晦韻題嚴居厚溪莊圖

鶴俸元知不療窮葉舟還入亂雲中溪莊直下秋千頃  
贏取閒身伴釣翁

### 夢中遊禹祠

湖上無人月自明夢中髣髴得閒行庭空滿地楸梧影  
風壯侵雲鼓角聲世異客懷增慘愴秋高歲事已崢嶸

長歌忽遇騎鯨客喚取同朝白玉京

感懷

老抱遺書隱故山鏡中衰鬢似霜菅規模肯墮管蕭亞  
夢想每馳河渭間竹帛竟孤千載事江湖敢恨一生閒  
殘功賴有吾兒續把卷燈前為破顏

酒熟

侯印何由得酒泉小槽新熟亦欣然放翁達處過彭澤  
客自在傍吾自眠

病起遊近村

老人摧頽絕造請門設常關草生徑一年三百六十日  
三百五十九日病一日不病出忘歸繞村處處扣柴扉  
水東溪友新酒熟舍北園公菰菜肥平生養氣心不動  
黜陟雖聞了如夢從今病愈即相尋共聽糟牀滴春瓮  
秋夜讀書示兒子

久病少睡眠往往中夕起呼燈取書讀不能盡數紙喟  
然置之歎生世後闕里持螯欲測海遽復迫老死人生

各有業唐虞本吾事詩書脫秦厄天意固在此異端塞  
穹壤作俑孰為始神禹逝不還吾其如泝水

秋晚書感

丘塚相望故舊空放翁猶復寄溫中少眠危坐待窗白  
得酒細傾生頰紅雖媿蛟龍起雲雨尚勝魚鳥困池籠  
秋來莫道無遊興野渡村橋處處通

王成之給事挽歌辭

昔沂黃牛峽曾經白鷺洲從容參步武談笑極風流晚

預蓬萊客時從襖袂遊揮毫看半醉追想只添愁

又

詩騷湘水客風度曲江公一夕南樓去千秋東省空囊  
封震朝右墨敕絕宮中贈極文昌貴君恩厚飾終

書南堂壁

偶築湖邊舍侵尋四十春山丘未瘞骨詩酒尚關身樵  
路霜侵屨漁舟雨墊巾忝蒙鄉黨敬六聖有遺民

予生於宣

和乙巳歲

又

荒寒淺村步隱翳小茅茨偶逐漁樵住都忘歲月移閒  
惟接僧話老始愛陶詩耆齒猶須幾羸然敢自期

秋晚

寒渚雁新下壞牆蛩夜吟庭莎欲無色園樹不成陰霑  
灑孤臣淚馳驅壯士心明朝鏡中髮飽受雪霜侵

晨起待子聿歸

老人盥櫛罷坐待汝晨省忽思隔重關懷抱增耿耿小

雨暗北窗誰與慰淒冷卷書默袖手奈此清晝永懸知  
河橋下亦已喚舴艋長路歸當飢呼童具湯麤

信筆

吾生本暫寓無日不可死區區遲速間何地著愠喜朝  
移一株石暮引一脉水是中亦何樂一笑聊爾耳

又

有酒或一醉無酒終日間雨足通南澗木落見西山飯  
飽出柴門本散腰脚頑偶然遇野人笑語欲忘還

龜堂東窗戲弄筆墨偶得絕句

身如蠶老已三眠一繭何妨自裹纏  
豆飯藜羹支永日  
槿籬竹屋送餘年

又

一樽且復罄幽歡不是癡頑強自寬  
死去何憂累兒子  
千錢可買市成棺

又

北菴睡起坐東廂無事方知日月長  
天與詩人送詩本



一雙黃蝶弄秋光

又

老衰有驗詩先退  
勲業無心夢漸稀  
淺浦小山孤絕處  
數家烟火自相依

又

老人孤寂似無家  
午枕初回日已斜  
偶得風和身亦健  
舍南舍北探梅花

次呂子益韻

呂子奇才非復常詩來起我醉中狂太音誰和陽春曲  
真色一空時世粧東閣獻諛無轍迹西湖寄傲有杯觴  
病懷正待君前被墨妙時須寄數行

舍北行飯書觸目

晚飧初潑一甌茶曳杖閒行興未涯烟樹參差墨濃淡  
風鴉零亂字橫斜夕陽偏傍平橋路寒蝶猶依晚菊花  
堪笑衰翁耐荒寂短衣霑露未還家

又

落雁昏鴉集遠洲青林紅樹擁平疇意行舍北三叉路  
閒看橋西一片秋小婦破烟撐去艇丫童橫笛喚歸牛  
形容野景無餘思自怪癡頑不解愁

明日復得五字

羸病偶不死端居思出遊山寒麥苗短天濶雁聲適  
學劍元癡絕脂車久罷休鄰翁獨眷眷同好自相求

又

腰痛今朝愈褰裳野興長黃鴉號亂篠碧蝶繞枯桑陂

壞良疇廢村空舊路荒十年逢九潦誰與問蒼蒼

十一月二十二日夜待子聿未歸

寒爐火半銷壞壁燈欲死人行籬犬吠月出林鵲起吾  
兒信偶非長路老子可憐煎百慮人人父子與我同立  
朝勿遣交河戍

南窗

暄妍一窗日的皪數枝梅小鼎煎茶熟幽人作夢回新  
春又將近晚景但堪哀用底舒懷抱殘書闔復開

幽居

衰鬢蕭條笑舊青一枝棲穩寄餘齡徐行不媿衣露肘  
安卧何妨席見經視客恰如堂上燕捐書那願案頭螢  
時時開說前賢事聊遣鄉間識典刑

春近山中即事

乞得松楠手自栽結茅聊喜避風埃百年孰與夢長短  
萬事只如雲去來雪後梅花初半吐身閒樽酒盍頻開  
錦官城外青羊路常記當年小獵回

又

節物貧家有故常  
春盤臘粥逐時忙  
悠悠歲月催雙鬢  
草草雞豚薦一觴  
人意自殊平日樂  
梅花寧減故時香  
小園新展西南角  
挂樹青蘿百尺長

又

世亂王孫泣路隅  
時平野老醉相扶  
種楨正可三年大  
愛竹何曾一日無  
細路迢迢上雲雨  
輕舟渺渺入菰蒲  
暮歸剩欲談幽勝  
安得丹青為作圖

雪夜感舊

江月亭前樺燭香  
龍門閣上馱聲長  
亂山古驛經三折  
小市孤城宿兩當  
晚歲猶思事鞍馬  
當時那信老耕桑  
綠沉金鎖俱塵委  
雪灑寒燈淚數行

將進酒

我欲挽住北斗杓  
常指蒼龍無動搖  
春風日夜吹草木  
只有榮盛無時凋  
我欲剗斷日行道  
陽烏當空月杲杲  
非惟四海常不夜  
亦使人生失衰老  
如山積麴高崔嵬

大江釀作蒲萄醅  
頽然一醉三千杯  
借問白髮何從來  
歲暮懷張季長

已迫桑榆景  
況逢梅柳時  
功名終自誤  
老病獨如期  
醉眼嫌天迮  
孤吟覺鬼悲  
唐安在何許  
無字寄相思

謝朱元晦寄紙被

木枕藜牀席  
見經卧看飄雪入窗櫺  
布衾紙被元相似  
只欠高人為作銘

又



紙被圍身度雪天  
白於狐腋軟於綿  
放翁用處君知否  
絕勝蒲團夜坐禪

送王季嘉赴湖南漕司主管官

它人作陵邑榜笞朝暮急  
王子乃不然袖手萬事集  
它人西入都競裁丞相書  
王子掉頭去長沙萬里餘  
問子謀身無乃左凜如霜  
松姿磊砢屈原賈誼死有靈  
計此兩人心獨可

菴中夜興

示疾維摩無待者夜闌自掩草菴門有情梅影半窗月  
相應雞聲十里村紙帳擁裘尋斷夢地爐撥火煖殘樽  
扶衰又踐新春境萬事元知不足論

初春欲散步畏寒而歸

峭寒漠漠入重貂酒力欺人凝不消春困苦多無處賣  
客魂欲斷倩誰招一溪水淺梅枝瘦四野雲酣雪意驕  
欲到前村無奈嬾却尋歸路度西橋

憶昔

憶昔從戎出渭濱  
壺漿馬首泣遺民  
夜棲高冢占星象  
晝上巢車望敵塵  
共道功名方迫逐  
豈知老病只逡巡  
燈前撫卷空流涕  
何限人間失意人

戊午元日讀書至夜分有感

七十年来又四年  
雨聲燈影故依然  
未收浮世風漚夢  
尚了前生蠹簡緣  
老學辛勤那有補  
舊聞零落恐無傳  
先師鉢袋終當付  
歎息誰能共著鞭

又

強戴羅幡怯歲增光陰堪歎捷飛騰簷間點滴新春雨  
窗下青熒半夜燈傍架討尋書散亂倚屏吟嘯髮鬢鬢  
極知老境惟當佚絕學端居恨未能

雜感

志士山棲恨不深人知已是負初心不須先說嚴光輩  
直自巢由錯到今

又

勸君莫識一丁字此事從來誤幾人輸與茅簷負暄叟

時時睡覺一頻伸

又

世事紛紛無已時  
勸君杯到不須辭  
但能爛醉三千日  
楚漢興亡總不知

又

百年鼎鼎成何事  
寒暑相催即白頭  
縱得金丹真不死  
摩挲銅狄更添愁

又

世間魚鳥各飛沉茅屋青山無古今畢竟替他愁不得  
幾人虛費一生心

又

一杯濁酒即醺然自笑閒愁七十年今日出門天地別  
此身如在結繩前

又

山人那信宦塗艱強著朝衣起曉班豪氣不除狂態作  
始知只合死空山

又

老子傾囊得萬錢  
石帆山下買烏犍  
牧童避雨歸來晚  
一笛春風草滿川

又

故舊書來訪死生  
時聞剝啄叩柴荆  
自嗟不及東家老  
至死無人識姓名

又

忍窮待死十年間  
老子誰知老更頑  
溪友留魚供晚酌

鄰僧送米續朝餐

歎老

朋儕什九墮丘墟自笑身如脫網魚  
委命已悲吾道喪垂名真負此心初  
齒殘僅可決濡肉眼澀知難讀細書  
家事豈容闕老子兒曹努力事耕鋤

朝飢食齏麪甚美戲作

一杯齏餽飫老子腹膨脝坐擁茅簷日  
山茶未用烹

又



一杯麤餽飫手自芼油葱天上蘇陀供懸知未易同

漁隱堂獨坐至夕

斜倚筇枝岸幅巾閉門久已謝知聞中庭日正花無影  
曲沼風生水有紋三尺桐絲多靜寄一樽玉瀝足幽欣  
世間萬事都忘盡惟向閒中屢策勲

讀書

讀書肝膽尚輪囷蠹簡堆中著此身飽識三千餘歲事  
已為七十四年人鏡中衰鬢難藏老海內虛名不救貧

只欲從今都掃盡  
剩沽春酒答新春

北望

昔我初生歲中原  
失太平寧知墓木拱  
不見塞塵清  
京洛無來信  
江淮尚宿兵  
何時青海月  
重照漢家營

蘭

南巖路最近  
飯已時散策  
香來知有蘭  
遽求乃弗獲  
生世本幽谷  
豈願為世娛  
無心託階庭  
當門任君鋤

古梅

梅花吐幽香百卉皆可屏一朝見古梅梅亦墮凡境重  
疊碧蘚暈天矯蒼虬枝誰汲古礪水養此塵外姿

山腳散步由舍北歸

偶散東岡步因成北渚遊鴉昏先小泊魚暖欲羣浮緩  
曳紅藤杖斜披紫綺裘閒身病亦可隨處得無愁

又

幽徑欣行藥衰年困負薪梅殘香更遠草動綠初勻魚  
似濠梁樂鷗如海上馴度橋成一笑微健及新春

又

空碧升團月江郊弄夕霏生涯今始是年事古猶稀冰  
解魚初躍風和雁欲歸興來忘遠近草露已沾衣

寄題連江陳氏拂石軒

李似之嘗  
有歌詞

平生聞說西江水百丈齋淪深見底漁舟來去白鷗飛  
上有綸巾隱君子作詩自許輩陶謝敵傲煙雲弄清泚  
紛紛聲利滿人間耳本不聞安用洗李公過江號高流  
逸氣凜凜橫清秋沙邊一笑偶邂逅掃石蔭松相獻酬

浩歌聲斷七十載尚寄萬壑風颼颼放翁老憊狂未歇  
買船欲作西江遊

得張季長書以大蓬見稱蓋以予寄祿官視昔秘  
書監也因作五字寄之

老病江湖上煩公問死生僊蓬雖誤到殘錦只虛名

近歲

裁損濫恩所謂十色錦者所存亡幾

點滴三更雨淒涼萬里情向來遺恨

極不遂隱青城

病足累日不能出菴門折花自娛

頻報園花照眼明  
蹒跚正廢下堂行  
擁衾又聽五更雨  
屈指元無三日晴  
不奈病何拋酒醖  
麤知春在賴鶯聲  
一枝自浸銅瓶水  
喜與年光未隔生

書意

帝命煌煌敕百神  
方傾天漢洗邊塵  
但須荊州一好漢  
安用商山四老人  
竹帛恐貽千古笑  
江湖未媿百年身  
此心欲與何人說  
病足呻吟又過春

新燕

天工不用剪刀催山杏溪桃次第開要信今年春事早  
社前十日燕新來

北巖采新茶用忘懷錄中法煎飲欣然忘病之未  
去也

槐火初鑽燧松風自候湯攜籃苔徑遠落爪雪芽長細  
吸襟靈爽微吟齒頰香歸時更清絕竹影踏斜陽

連日至梅僊塢及花涇觀桃花抵暮乃歸

千載桃源信不通鏡湖西塢擅春風舟行十里畫屏上

身在西山紅雨中俗事挽人常故故夕陽歸櫂莫怱怱  
豪華無復當年樂爛醉狂歌亦足雄

又

桃花塢近釣魚磯不比劉郎萬里歸水底紅雲迷醉眼  
樽前絳雪點春衣病依几杖猶能出老愛風光未忍違  
天借清遊每窮日夜深炬火候柴扉

劔南詩藁卷三十六



欽定四庫全書

劔南詩藁卷三十七

宋 陸游 撰

病中作

破裘縫更暖糲食美無餘  
摩詰病說法虞卿窮著書  
身羸支枕久足蹇下堂踈  
今日晴窗好幽懷得好據

題郭太尉金州第中至喜堂

安康甲第天下傳  
玉題繡井摩雲煙  
落成鼓吹震百里

意氣欲壓秦山川第中築堂最宏麗奎畫岌岌蛇龍纏  
知公所喜在勇退顧視解組如登仙公心雖爾天未可  
終倚北伐銘燕然十年宿衛功第一小却卧護長淮邊  
帳前犀甲羅十萬幙下珠履逾三千願公小緩高枕計  
即今河雒猶腥羶出師雞鹿擁皂纛畫象麒麟我玉蟬  
是時公喜客亦樂為公湍瀉黃金船

莫春

山陰又見莫春初禁火園林社雨餘世事不妨隨日改

年光未遽與人疎  
豉香下箸嘗蓴菜  
鹽白開奩得鱖魚  
草草一杯終可喜  
數間茅屋亦吾廬

小園新晴

散髮陽狂不計年  
園林只在小窗前  
斷虹千尺卷殘雨  
新月一鉤生暮天  
臘釀拆泥留客醉  
山茶落磴喚兒煎  
物華心賞元無盡  
剩住人間作地仙

又

衰病猶煩藥石功  
殘春終日在園中  
地偏幽草為誰綠

雨霽新花如許紅足蹇扶持須穉子杯深暖熱賴鄰翁  
此身雖向閒中老若比休休却未同  
司空表聖休休亭  
歌曰休休休休莫莫  
莫伎倆雖多性靈惡  
賴是常教閒處著

春晚感事

據鞍千里何曾病閉戶安眠百病生每憶嘉陵江上路  
插花籍草醉清明

又

寒食梁州十萬家鞦韆蹴鞠尚豪華犢車輕轡歸城晚

爭碾平蕪入亂花

春晚園中作

杏子青青梅子酸  
山園轉眼又春殘  
老懷豈復小年樂  
病骨不禁清曉寒  
學術背時甘義墮  
功名無路久心闌  
蠶收麥熟吾何恨  
但遣銀杯似海寬

題夷堅志後

筆近反離騷  
書非支諾臯  
豈惟堪史補  
端足擅文豪  
馳騁空凡馬  
從容立斷鰲  
陋儒那得議  
汝輩亦徒勞

幽居

小舫藤為纜幽居竹織門  
短籬圍藕蕩細路入桑村  
魚膾搓頭美醅傾粥面渾  
殘年謝軒冕猶足號黎元

聞烏聲有感

小市提壺酤濁酒東陂脫袴插青秧  
歸來靜卧茅簷底如覺閑中白日長

又

流年冉冉去無情日夜溪頭布穀聲  
城郭雖存人換盡

令威應悔學長生

與子虞子坦坐龜堂後東窗偶書

時鳥朝莫鳴芳草日夜生春風捨我去歲律俄崢嶸綴  
簇繭白白出陂稻青青鳴機織苧葛暑服亦已成小兒  
結山房窗戶頗踈明萬事不挂眼朱黃浩縱橫佳哉東  
北風吹下讀書聲功名詎敢望且復慰父兄

是日午間聞子聿在

山半讀書  
相與欣然

行年

行年過七十與世兩相忘墨沼龜魚樂藥園芝朮香吾  
生一蟲臂世路幾羊腸楮弁新裁就翛然學道裝  
新作  
兩褚

冠

東窗小酌

烏帽翩僊白苧涼東窗隨事具杯觴流年不貸世人老  
造物能容吾輩狂藤葉成陰山鳥下檜花滿地蜜蜂忙  
何人畫得農家樂咿軋縑車隔短牆

又



市塵遠不到林塘嫩暑軒窗晝漏長  
蠶妾趁時爭煮繭農夫得雨正移秧  
徒行有客驚頑健爛醉無人笑老狂  
却掩菴門徑投枕鼾聲雷起撼蓊牀

西林傳菴主求定菴詩

粥後鐘魚未動時夜燈仍對碧琉璃  
不須更說能生慧枯木寒灰也自奇

又

業力驅人舉世忙西林袖手一爐香  
未能成佛渾閑事

十劫看渠坐道場

夏日

將雛燕子漸離巢過母龍孫已放梢日出並湖初曬網  
雨餘垂屋旋添茅家貧舊業元知廢身老微官久合拋  
莫恨門前車馬絕豈無農圃與論交

又

過眼春光久已空曬絲擣麥又匆匆新泥滿路梅黃雨  
古木號山月暈風角黍茭新間罇俎靈符墨濕照房櫳

歲華不為衰翁駐且付餘生一笑中

又

吳中五月暑猶微竟日南堂坐掩扉綠樹露

一作霧香鶯

獨語畫廊風惡

一作急

燕雙歸三千界內人人錯七十年

來念念非投老萬緣俱掃盡從今僧亦不須依

又

雨斷雲歸旋作晴尚餘紅濕在簾旌燕雛掠地飛無力  
梅子臨池墜有聲米糲解包供午餉萍蘆傍枕析朝醒

此翁不負頑軀處捫腹時時繞舍行

又

梅雨初收景氣新太平阡陌樂閑身陂塘漫漫行秧馬  
門巷陰陰挂艾人白葛烏紗稱時節黃雞綠酒聚比鄰  
掀髯一笑吾真足不為無錫更歎貧

夜酌

酒渌孤燈夜梅黃細雨天聊成顧影醉復作曲肱眠腰  
下蘇秦印囊中趙壹錢丈夫隨所遇底處不陶然

夏夜

夏夜誰知亦自長幽居渺在水雲鄉月侵竹簟清無暑  
風度衣篝潤有香棲鵲自驚移別樹流螢相逐過橫塘  
放翁尚苦餘醒在細綆銅餅落井牀

又

山崦風生鵬嘯悲柴門月上樹陰移熏衣汗雨初乾後  
把卷蚊雷不動時孤悶難禁終歲病浮生易滿百年期  
釣竿只待清秋近一棹煙波信所之

又

展轉紗幮睡不成一藤扶僊繞廊行月昇雙鵲移枝宿  
露下孤螢綴蔓明汲井忽驚人已起開門堪歎事還生  
羽衣道帽從吾好拍子煙中起磬聲

又

龜息綿綿破五更起扶藤杖並南榮擇栖孤鵲尚三匝  
司旦老雞俄一鳴移坐徐看山月吐脫巾聊受水風清  
不知竟是真仙未夜夜神遊白玉京

泛舟

水鄉元不減吳松短櫂沿洄野興濃鬱鬱冬青森翠葆

離離夜合散紅茸

水涯多此二樹

村深初度穿林笛寺近先聞

出塢鐘歸路夕陽猶滿岸憑舷一笑覽衰容

感舊

要識梁州遠南山在眼邊霜郊熊撲樹雪路馬蒙羶慘

淡遺壇側

拜韓信壇至今猶存

蕭條古廟壩

沔陽有蜀後主所立武侯廟

百詩

猶可想歎息遂無傳

予山南雜詩百餘篇舟行過望雲灘墜水中至今以為恨

又

夜涉南沮水朝過小益城梯山天一握度棧土微平雨

近秦雲暗霜高隴月明至今孤夢裏喝馬有遺聲

喝馬  
皆七

字韻語聞之  
悲愴動人

又

早發金堆市更衣石櫃亭灘聲秋後壯山色雨餘青道

濤愁車轍橋危避駝鈴功名竟何在撫事感頽齡

又



塵土暗貂裘森然白髮稠年光真衮衮吾事竟悠悠馬

宿平沙夜

軍中馬及廐卒夏夜皆露宿沙上

烽傳絕塞秋

平安火並南山來至山南

城下故人零落盡追寫只添愁

又

凜凜隆中相臨戎遂不還塵埃出師表草棘定軍山壯  
氣河潼外雄名管樂間登堂拜遺像千載媿吾顏

又

我思杜陵叟處處有遺蹤錦里瞻祠柏綿州弔海棕蹉

跼悲捱驥感會失雲龍生世後斯士吾將安所從

書喜

雨足郊原正得晴地餘萬里盡春耕陰陰阡陌桑麻暗  
軋軋房櫬機杼鳴亭鼓不聞知盜息社錢易歛慶秋成

天公不負書生眼留向人間看太平

自詠

平生萬事付慙癡兀兀騰騰到死時夜踏亂雲過略彴  
曉分寒溜注軍持東嶺山客招烹石渡海蕃僧乞製碑

作箇生涯君勿笑挂天勲業亦兒嬉

露坐

立秋前五日

旋削甘瓜進酒卮斷雲漠漠斗離離北臨積水風來壯  
東恨長林月上遲秋近不堪聞急杵夜涼已復怯輕絺  
天孫老抱河梁恨豈獨人生事可悲

又

岸幘臨窗意未便又拖筇杖出庭前清秋欲近露霑草  
皎月未升星滿天過埭船爭明旦市蹋車人廢徹宵眠

齊民一飽勤如許坐食官倉每惕然

親舊或見嘲終歲杜門戲作解嘲

十年蕭散住林間只是幽居不是閒  
續得茶經新絕筆補成僧史可藏山  
詩題紫閣憑雲寄藥報青城附鶴還  
自笑何曾總無事枉教人道閉柴關

北窗

寒泉斷藕素絲長紋簾開瓜碧玉香  
午睡覺來桐影轉無人可共北窗涼

新秋以窗裏人將老門前樹欲秋為韻作小詩

殘暑無多日幽居近小江酒醒中夜起松月入山窗

又

陸子江海人所願守節死潮生釣瀨邊月落菱歌裏

又

小智每自私大患緣有身孰能忘彼己吾將友斯人

又

野艇千錢買明當泛渺茫但能容一榼家具不須將

又

立朝紹興間猶及見諸老魂夢不可逢邱坟閉秋草

又

朝真方捨杖步月始開門零落山花後經旬掩綠樽

又

唐虞雖已遠至道豈無傳度日一編裏懷人千載前

又

秋風昨夜來聲滿梧桐樹故人渺天末此夕誰與度

又

少年雖婚宦淡然本無欲婆娑三畝園自歎不啻足

又

無食妨何事吾兒可散愁焚香正巾褐聽汝讀春秋

食新有感貧居久蔬食至是方稍得肉

壯遊車轍遍天涯晚得祠官不去家優老每慙千載遇  
食新又歎一年加出波魚美如通印下棧羊肥抵卧沙  
捫腹笑歌仍索酒不嫌鄰舍怪譁譁

秋夕露坐作

銀河半落露華清  
南斗闌干北斗明  
冉冉方悲老將至  
纖纖又歎月初生  
酒牀細滴香浮氣  
衣杵相聞聲滿城  
萬卷讀書無用處  
却將耕稼報昇平

有年

不向神林乞雨晴  
天公自解相西成  
急符收盡無逋賦  
新酒沽多足笑聲  
外戶徹扃停夕柝  
齊民相勸力春耕  
傳聞夜市連三鼓  
却恨龐公不入城



# 大雨

北風挾驕雲突起塞宇宙赫日初未西盼轉失白晝翻  
空黑幟合列陣奇鬼鬪雨鏃飛縱橫雷車助奔驟平階  
水入戶溝瀆不能受對面語不聞持繖避屋漏兒童抱  
圖書衣屨那暇救縱暴理豈長忽已收簷雷比鄰更相  
勞捃拾如過寇老子獨癡頑長歌對醇酎

## 東西家

東家雲出岫西家籠半山西家泉落澗東家鳴珮環相

對籬數掩各有節三間片羹與麥飯日不廢往還兒女  
若一家雞犬意自閑我亦思卜鄰餘地君勿慳

予自春夏屢病至立秋而愈作長句自賀

良藥扶衰抵萬金漸加糜粥輟呻吟溪風拂簟有秋意  
山影半庭生夕陰薄俗只成驚老眼幽居正得遂初心  
岸巾待月欄干曲更覺天公愛我深

七月十一日雨後夜坐戶外觀月

浴罷淡無事岸幘臨前軒雷雨始退散雲月相吐吞風

蟬斷還續枝間終夕喧露螢闔復開熠熠綴草根殘暑  
會當去孰敢厭炮燭四時莽相代所歎歲月犇歡悰挽  
不留白髮生無根兒女日夜長子且復有孫澗松偶未  
薪野鶴猶孤騫華表幸來歸餘事何足言

王與道尚書挽詞

朗朗百間屋汪汪千頃陂直能彰主聖清不願人知許  
國多艱日逢辰獨斷時人猶望霖雨殄瘁不勝悲

又

昔遇開藩日嘗叨下榻榮從容陪讌笑傾倒及平生借  
譽言猶在懷知涕易橫終慙五字句不盡百年情

初秋

雨氣排殘暑風聲送早秋拂窗聞葉落繞井看螢流卧  
起須人助炊菴尚自謀蕭條歲將晚百慮入搔頭

感秋

秋色關河外秋聲天地間壯士感此時朝鏡凋朱顏一  
身寄空谷萬里夢天山噫嗚怒皆裂憤激悲涕潛古來

真龍駒未必置天閑長松倒澗壑委棄同秦管得志未  
可測談笑濟時艱凜然出師表一字不可刪

北窗試筆

老來日月速去若弦上箭方看出土牛已復送巢燕清  
晨覓縑衣正午廢紈扇北窗小雨餘盆山鬱葱禱病體  
為之輕一笑玩筆硯雖無顏柳工揮灑亦忘倦紙窮墨  
漸燥蛇虵爭入卷屬兒善藏之勿遣俗子見

秋思

秋毫不受俗塵侵隨處悠然一散襟天際挂虹初斷雨  
雲頭翳日又成陰引泉北澗長澆竹拂榻西窗自斲琴  
藥石掃空身便健始知萬事要無心

又

雨長蒼苔滿釣磯坐令秋暑歛餘威天高月破殘雲出  
野曠風驚蠹葉飛終歲鉏犁猶不飽萬家碁枰獨無衣  
早知竟坐儒冠誤射虎南山未必非

又

身似龐翁不出家一窗自了淡生涯  
山薑零落初成子石竹淒涼半吐花  
寒澗挹泉供試墨墮巢篝火喚煎茶  
掩關本意君知否兩耳衰年不耐譁

又

老懷不慣著閑愁信脚時為野外遊  
過雁未驚殘月曉片雲先借一天秋  
村醅似粥家家醉社肉如林處處留  
七十已稀今又過問君端的更何求

新涼

山居謝來客病體喜新涼幽草上牆綠落花霑土香捐  
書心自息聽雨夢偏長菰葉鄰人餉欣然獨舉觴

又

菰首初離水薑芽淺漬糟粳香等炊玉韭美勝炮羔露  
下殘蕪濕風生萬木號從今更何事痛飲讀離騷

自遣

踽踽人間未死身鄉間共敬六朝民睡無由著緣多感  
醉不能成坐一貧幽屏最憎蟲弔夜狂吟略似鳥鳴春



也知世俗誰知我猶待君王獵渭濱

自規

曲肱飲水彼何人汝獨何為厭賤貧大節勿汙千載史  
少時便盡百年身圖書幸可傳遺業雞黍何妨約近鄰  
今日仲秋還小雨剩鉏麥龍待新春

鄉人謂八月一日  
得雨宜來年麥

感舊末章蓋思有以自廣

庚寅歲入巴東破卧聽清猿月下聲二十九年窮未死  
却思當日似前生

又

百堂小益最初程朱棧青崖照眼明十日經行圖障裏  
時時馬上聽鶯聲

又

路入梁州似掌平鞦韆蹴鞠趁清明未論日遠長安近  
且喜南山天際橫

又

青城山裏屏風疊太華峰頭腰帶鞵跨鶴橫空吾欲去

九秋月露看青冥

秋日獨酌

草木秋始繁黃碧照籬落雖云各有時意緒終索寞  
人固多感對此聊命酌風霜肅萬物過雁在寥廓吾當  
識其大微物不足託何以豁曠懷短章可時作

風興

草堂風雨少睡眠骨冷始覺非壯年水鳥長鳴聲戛然  
庭中棲鴉亦已翩老人清餓如龜蟬起坐甚愛小窗妍

一生宦遊膏火煎歸來杜門氣麤全人看雖不直一錢  
知我自有穹穹天賦詩橐成棄不傳殘鐘斷磬知誰編

身世

身世浮沉等一漚卧看校尉例封侯青燈微火藥鐺夜  
淡月淒風衣杵秋醉裏不辭嘲兀兀吟邊時得寄悠悠  
即今老眼無開處又向城南倚寺樓

憶昔

憶自梁州下益州身閒處處醉紅樓早知虛起彈冠意

悔不常為秉燭遊詩思已慙馳陣馬目光猶覺射車牛  
蓮峰日觀何時到下看人間萬里秋

豐歲

豐歲驩聲動四鄰深秋景氣繁如春羊腔酒擔爭迎婦  
鼉鼓龍船共賽神處處喜晴過甲子家家築屋趁庚申  
老翁欲伴鄉間醉先辦長衫紫領巾

村居

孤村淺浦近江城西折坡陀一嶺橫墟落煙生舍莫色

園林風勁作秋聲年豐租稅無逋負酒熟鄉鄰遞送迎  
老病愈知難報國只將高枕送餘生

中秋夜半後無雲而月色微淡尤為絕景

輕煙薄靄九霄寒素月渾如隔縠看此夕洞庭應更好  
誰能從我跨青鸞

夜賦

老人不食覺魂清恍若身遊白玉京夜靜月驚林鵲起  
水涼風颭露荷傾昏燈一點窺孤夢畫角三終轉五更

欲醉海山還嬾去且攜羽扇憩青城

遣興

學廢文章傳世少身閒車馬過門疎壯心易盡羸肩酒  
義氣肯貪熊掌魚列聖仁恩深雨露兩京宮闕尚邱墟  
素懷華渭嗟誰問且作狂歌楚接輿

秋賽

柳姑廟前煙出浦冉冉縈空青一縷須臾散作四山雲  
明日來為社公雨小巫屢舞大巫歌士女拜祝肩相摩

芳茶綠酒進雜還長魚大截高嵯峨常年徵科煩筆楚  
縣家血濕庭前土妻啼兒號不敢怨期會常憂累官府  
今年家家有餘粟縣符未下輸先足木刻吏蒲作鞭自  
然粟帛如流泉儲積不愁無九年

寄題周丞相平園

先生道心平如砥秋毫忿慾何曾起漫將周易著牀頭  
本不洗心那洗耳先生國論如砥平三朝倚之作權衡  
泰階兩兩元不動自然萬里無攙槍如今歸來曲肱卧



世事無窮俱看破不栽桃李不鉏蘭山僧野叟時來過  
吾儕七十固已壽更到期頤亦何有倘知生死本自平  
拈放一邊如把酒

雨三日歌

秋風戒寒雨三日空村無人莫蕭瑟北窗書生萬卷書  
齒豁頭童真可惜輪囷新蟹黃欲滿磊落香橙綠堪摘  
興來尚能氣吞酒詩成不覺淚漬筆士生蓬矢射四方  
掃平河雒吾儕職湖中隱士倘可逢握手與君談至夕

戲作治生絕句

治生何用學陶朱少許能慳便有餘惜酒已停晨服藥  
省油仍廢夜觀書

龜堂雜題

龜堂端是無能者妄想元無一事成最後數年尤可笑  
飽餐甘寢送浮生

又

癡頑老子老無能遊惰農夫酒肉僧閉著菴門終日睡

任人來喚不曾應

又

長腰玉粒出新春  
秋獲真成畝一鍾  
衣食廩供官賦足  
何妨世世作耕農

又

冷雨蕭蕭澀不晴  
亂書圍坐正縱橫  
忽聞小瓮新醅熟  
急喚兒童洗破觥

偶讀陳無已芍藥詩云一枝剩欲簪雙髻  
未有人

間第一人蓋晚年所作也為之絕倒戲作小詩  
少年妄想已癡絕鏡裏何堪白髮生縱有傾城何預汝  
可憐元未解人情

村舍

過埭六七里並江三四家潮生魚滬短風起鴨船斜世  
守桑麻業長無市井譁

雨中作

雨聲可愛秋方見睡味無窮老始知半醉擁衾支倦枕

誰能三復放翁詩

江郊

白草江郊莫青帘野店秋喧呼估船客鬼我飲家流老  
豈題橋柱愁惟倚寺樓更傷昏澀眼煙際數歸牛

閒趣

被擁聽秋雨兒扶上夜香甌炊霜後稻糲漬社前薑馬  
病空思路僧歸却住房風扉久嘔軋錯認艣聲長

又

飯滿七綴鉢香凝百衲窗雨聲酣曉枕燈燼落秋釭疾  
豎元知遯天魔亦已降超然對兒子未媿鹿門龐

又

老至衰滋劇秋高病尚侵坐看兒學字卧聽客彈琴困  
消雀方鬪栖寒雞欲瘖世情元自嬾不是事違心

小飲

莫笑放翁顛歌呼覆酒船雙螯初斫雪珍鱸已披緜寒  
雨連旬日新橙又一年更須重九到作意菊花前

作字

整整復斜斜  
翩如風際鴉  
書成半行草  
眼倦正昏花  
未辦倉盛筆  
寧能錐畫沙  
老夫端可媿  
頭白不名家

晝睡起偶賦

蝴蝶與蒙莊  
頽然寓一牀  
日隨香篆過  
夢逐雨聲長  
酒喜新篳綠  
橙如故歲黃  
昏昏還隱几  
誰識老龜堂

小舟過吉澤効王右丞

澤園霜露晚  
孤村煙火微  
本去官道遠  
自然人迹稀  
木

落山盡出鐘鳴僧獨歸漁家閒似我未夕閉柴扉

湖山雜賦

門前天鏡倒千峰舍後菰蒲與海通乘興出遊無遠近  
煙波何處覓孤蓬

又

一生到處賈胡留身屬官倉不自由白首歸來更何恨  
十年爛醉石帆秋

又



東西相望兩湖橋來往無時一畫撓買酒每尋村市步  
煮蔬時就野僧寮

又

不到梅山二十霜望中常似隔他鄉一杯甕粟紗燈下

最憶初寒宿上方

梅山寺與敝廬南北相望  
無二十里然不到最久

又

煙中一棹小江秋憶上牛頭倚寺樓今日籬邊殘照裏  
却從西北望牛頭

太息

早歲元于利欲輕但餘一念在功名白頭不試平戎策  
虛向江湖過此生

又

書生忠義與誰論骨朽猶應此念存砥柱河流僊掌日  
死前恨不見中原

又

自古才高每恨浮偉人要是出中州即今未必無房魏

埋沒邊沙死即休

又

關輔堂堂墮塞塵渭城杜曲又逢春  
安知今日新豐市  
不有悠然獨酌人

學書

九月十九柿葉紅閉門學書人笑翁  
世間誰許一錢直  
窗底自用十年功老蔓纏松飽霜雪  
瘦蛟出海挐虛空  
即今譏評何足道後五百年言自公

晚興

壯遊車轍遍天涯  
晚落農桑不自知  
許國雖堅身遽老  
讀書未倦眼先衰  
雲深嶺路樵歸晚  
雨細江亭渡發遲  
一事猶堪慰孤寂  
錦囊傾倒有新詩

秋晴見天際飛鴻有感

新晴天宇色正青  
羣鴻高騫在冥冥  
兒童相呼共仰視  
我亦扶杖來中庭  
豐年到處稻粱滿  
胡不暫下栖沙汀  
應須江海寄曠快  
肯為霜雪嗟飄零  
書生可笑不自喜

憔悴久翦籠中翎鷗波萬里每媿杜鶴化千載知非丁  
風前哀號漫激烈月下孤影常竛竮詩成欲寫復嬾去  
誦似溪友聲泠泠

初寒獨居戲作

開殼一作鰕

得紫栗帶葉摘黃甘獨卧維摩室誰同彌勒

龕宗文樹雞柵靈照挈蔬籃一段無生話燈籠可與一作

自談可

夢觀牡丹

忘却晨梳滿把絲  
揀花嫌不似胭脂  
起來一笑看清鏡  
惟插梨花却較宜

書喜

水際柴荆鍵不開  
野人相覓漫敲推  
寒鴟陣黑疑雲過  
老木聲酣認雨來  
酒價日低常得醉  
官租時辦不勞催  
平生未省如今樂  
却笑傍觀誤見哀

又

今年端的是豐穰  
十里家家喜欲狂  
俗美農夫知讓畔

化行蠶婦不爭桑酒坊飲客朝成市佛廟村伶夜作場  
身是閒人新病愈賸移霜菊待重陽

又

湍川秋穫重頰肩拾穗兒童擁道邊夜夜江村無吠犬  
家家市步有新船奪攘不復憂山越安樂渾疑是地仙  
惟有衰翁最知達避兵猶記建炎年

小飲罷行至湖塘而歸

社酒真如粥面濃朱顏頃刻換衰容霜輕已覺樹搖落

雲起始知山疊重  
梅市魚歸衝雨棹  
寶林人定隔城鐘  
此翁大似遊僧樣  
爐煖窗深又過冬

病雁

祠祿將滿幸麤支朝夕遂不敢復有請而作是詩

蘆洲有病雁  
雪霜摧羽翰  
不辭道路遠  
置身湖海寬  
稻粱亦滿目  
鳴聲自辛酸  
我正與此同  
百憂雙鬢殘  
東歸忽十載  
四忝侍祠官  
雖云幸得飽  
早夜不敢安  
乃知學者心  
羞媿甚飢寒  
讀我病雁篇  
萬鍾均一簞

澤居



澤居僅足不求餘曠快真同縱壑魚平日酷憎蠅附驥  
莫年肯作鶴乘車齒搖但煮畎山芋眼澀惟觀冑監書  
此際自應還往絕本無心與俗人疎

秋穫歌

牆頭累累柿子黃人家秋穫爭登場長碓擣珠照地光  
大甌炊玉連村香萬人牆進輸官倉倉吏鬻冷不暇嘗  
訖事散去喜若狂醉卧相枕官道傍數年斯民阨凶荒  
轉徙溝壑殓相望縣吏亭長如餓狼婦女怖死兒童僵

豈知皇天賜豐穰畝收一鍾富萬箱我願鄰曲謹蓋藏  
縮衣節食勤耕桑追思食不厭糟糠勿使水旱憂堯湯

戊午重九

朋舊相望天一涯登高結伴只鄰家秋風自欲吹紗帽  
衰鬢何曾泥菊花藥市神仙思益部饒盤節物記京華  
自憐病後歡悰薄小醉歸來日未斜

重九懷獨孤景略

昔逢重九日初識獨孤君並轡洮河馬聯詩劔閣雲已

悲吳蜀遠更歎死生分安得持卮酒澆君丈五坟

晨鏡

晨起覽清鏡有叟鬢已皤  
顴黃色類掩面皺紋如鞞熟  
視但驚歎初不相誰何久乃  
稍醒悟舉手自摩挲與汝  
周旋久流年捷飛梭生當老  
病死求脫理則那切勿彊  
撐拄據鞍效廉頗惟須勤把  
酒暫遣衰顏酡

秋霽遣懷

陸生少日心膽壯萬里憑陵寄疎放  
玉關曾誓馬革裏

滄海豈憂魚腹葬人生富貴本細事釣築逢時俱將相  
正令不遇亦何嫌藥鑊丹爐老青嶂今年秋晚苦多雨  
三十六溪新綠漲極知世事不足論霽日小舟行可榜

屏迹

昔者航濤江雲山迎我東擊楫誓江神永託冥冥鴻十  
年桑榆暖萬事馬牛風邇來愈屏迹庭戶深蒿蓬就甕  
挹新醅傍畦擷晚菰隣曲或念我小鮮亦時供喟然撫  
几歎恨今已龍鍾向使早十年何媿柴桑翁

初寒

今日霜露冷凜然悲莫秋垂帷跨微火發篋出輕裘徂  
歲逝將換殘生愈覺浮一杯還自閔小獵記梁州

風雨

風雨從北來萬木皆怒號入夜殊未止聲亂秋江濤渺  
然老書生白頭卧蓬蒿閉門不敢出裂面風如刀鄰人  
閔我寒牆頭過濁醪時哉一昏醉新橙宜蟹螯

龜堂自詠

龜堂一老翁短褐立秋風時過同籬菊身衰似井桐新  
霜萬瓦白朝日數樵紅且復尋書卷悠然度歲窮

又

采藤持織履剥楮治為冠看劒心空壯騎驢骨本寒病  
多辭酒伴老甚解祠官

予十月奉祠歲  
滿不復敢請

賴有扁舟在秋

濤萬里寬

閒居初冬作

香椀蒲團又一新天將閒處著閒身東窗換紙明初日

南圃移花及小春  
婦女晨炊動井臼  
兒童夜誦聒比鄰  
早知閭巷無窮樂  
悔不終身一幅巾

病中排悶

面骨崢嶸鬢雪新  
承平版籍有遺民


予生於心雖願繼宣和中

無傳學力不能支  
已廢身開卷眼昏如隔霧  
擁爐肺渴欲生塵  
老龐亦有兒孫念  
付與天公不問人

季秋已寒節令頗正喜而有賦

霜降今年已薄霜  
菊花開亦及重陽  
四時氣正無愆伏

比屋年豐有蓋歲風色蕭蕭生麥隴車聲碌碌滿魚塘  
老夫亦與人同樂醉倒何妨卧道傍



劔南詩藁卷三十七



欽定四庫全書

集部

劔南詩橐卷三十八

詳校官庶吉士臣陳若霖

主事臣呂雲棟覆勘

總校官檢討臣何思鈞

校對官修撰臣戴衢亨

謄錄監生臣楊浚明

欽定四庫全書

劔南詩藁卷三十八

宋 陸游 撰

秋懷

形骸歲歲就枯朽意氣時時猶激昂  
水遠浮鷗方浩蕩霜高殘菊更芬芳  
人皆有舌是非在劫未成灰時世長  
三百里湖行自復子孫努力事耕桑  
鏡湖廢百七十餘年故吾鄉多凶會  
有復之者

吳體寄張季長

九月十月天雨霜江南劍南途路長平生故人阻攜手  
萬里一書空斷腸人生強健已難恃世事變遷那可常  
兩家子孫各長大他年窮達毋相忘

嘲畜貓

甚矣翻盆暴嗟君睡得成但思魚鱗足不顧鼠縱橫欲  
騁銜蟬快先憐上樹輕朐山在何許此族最知名

俗言  
貓為

虎舅教虎百為惟不教上樹  
又謂海州貓為天下第一

立冬日作

室小財容膝牆低僅及肩方過授衣月又遇始裘天寸  
積篝爐炭銖稱布被綿平生師陋巷隨處一欣然

初冬

志士逢秋已自傷老人況復惜年光正看溪碓舂粳滑  
又見山坡下麥忙桐落井牀多槁葉菊殘衫袂尚餘香  
讀書有課真當勉剩貯明膏伴夜長

是日方  
買油

醉題

生來避世傲公卿，海內無人識姓名。  
九節筇邊秋萬里，長明燈下雨三更。  
心安白髮何勞掃，藥熟黃金固可成。  
只待蓬壺賦詩罷，却來京洛看昇平。

新作火閣

旋設篝爐下紙簾，樂哉容膝似陶潛。  
囊中佩藥無時服，架上堆書信手拈。  
似玉秋菰殊未老，如雲宿麥不須占。

掃空祠祿吾何欠，陋巷簞瓢易屬厭。

祠祿止此月

又

山路霜清葉正黃地爐火煖夜偏長中安煮藥膨脝鼎  
傍設安禪曲肱牀木槁不知年自往雲閑已與世相忘  
更闌坐穩人聲靜時聽風簾響暗廊

舍北行飯

蔓絡疎籬草滿塘飽嬉聊復步斜陽一霜驟變千林色  
兩犢新犁百畝荒野寺僧殘尚鐘鼓官堤舟過見帆檣  
歸來笑補空囊課寒日誰知亦自長

遣興

轍迹當年遍九州晚歸始解卧林邱愛身每戒玉抵鵲  
養氣要如刀解牛柔艣搖殘天鏡月短筇領盡石帆秋  
儘言未辦常局戶竟是吾身得自由

又

出仕纔堪斗大州初歸便擬築糟邱虛名大似月蟾兔  
榮路久如風馬牛唧唧悲蛩常弔夜蕭蕭蠹葉更禁秋  
靜觀世事頻興歎千載前時有許由

舟中

拖邊潮水落還生蓬底寒燈滅復明約束長年牢繫纜  
報人風雨有鼉鳴

又

蕭蕭風雨小江秋不是愁人亦合愁忽聽疎鐘知寺近  
笑尋沙路上牛頭

又

龕山古戍更漏聲白堦小市燈火明六十年間幾來往  
依然惻愴路傍情



雨夜感舊

雨來猛打窗燈暗猶照壁老人耿不寐撫事悲夙昔風  
生枯柏渡馬病金牛驛裊枝猿下飲登樹熊自擲危巢  
窺鶻栖深雪見虎跡至今清夜夢猶想嶠山碧廢棄謝  
功名老疾輟行役賦詩雖不工聊用慰今夕

夜聞落葉

我行出柴門初喜春草生俛仰幾何時落葉終夜聲嗟  
我日益老抱疾況未平晨興就盥櫛顧亦彊支撐齋中

有兩童熟視不能名定非張睢陽大笑頰冠纓死至人所同此理何待評但有一可恨不見復兩京

閉門

閉門高卧鏡湖傍元自無閒可得忙  
泛罷杯觴餘菊苦  
玩殘指爪帶橙香  
燈昏共度空階雨  
蛩冷偏依丈室牀  
不待衰年宦情盡  
未來如雁到衡陽

祠祿滿不敢復請作口號

今年高謝武夷君  
飯豆羹藜亦所欣  
參透莊生齊物論

掃空韓子送窮文心如脫穽  
犇林鹿迹似還山不雨雲  
猶幸此身强健在鄉鄰爭看布襦裙

又

祠庭八載竊榮名一飽心知合自營  
牘後落銜便手倦  
月頭鐫俸喜身輕弊衣不補惟頻結濁酒難謀且細傾  
賴有東臯堪肆力比鄰相喚事冬耕

又

白首還山不自存天書四降海邊村  
慙非故將前侯比

誤辱優賢養老恩龜壽自應能食氣鶴歸那得更乘軒  
從今再草公車奏惟有挂冠神武門

過鄰家

扶杖過吾鄰相誇自在身年豐稱貸少酒賤往來頻  
群散雞歸柵聲喧雀噪囷丁寧語兒子切勿厭沉淪

舍北野望

短景妨遊興長歌慰作勞葉凋西埭近水落北橋高  
病每隨時劇衰難與世鏐旗亭新釀美萬事一秋毫

又

斷壠圍蔬圃枯桑繫釣杙經行橋獨木佇立路三义野

卉棲孤蝶平川起亂鴉楮筇無定處興盡即還家

又

溪竹通西崦山蹊繚北村殘霞明水面落葉擁籬根野

父編龍具樵兒習兔園吾今井蛙耳敢復慕鵬鯤

又

早歲遭逢異中年促召頻馳驅猶許國卧起已須人藥

石三秋病風波萬里身  
籬門殘照裏慘淡易傷神

書感

常記當年賦子虛  
公卿交口薦相如  
豈知鶴髮殘年叟  
猶讀蠅頭細字書  
出處幸逃千載笑  
功名從負此心初  
荒園落葉紛如積  
日莫歸來自荷鋤

冬夜爐邊小飲

擁爐可使曲身直  
飲酒能回槁面紅  
若使金丹真入手  
飛騰亦在立談中

龜堂獨酌

幅巾蕭散餞餘齡  
江左諸賢可乞靈  
護枕小屏圖紫閣  
映窗矮卷寫黃庭  
曠懷與世元難合  
幽句何人可遣聽  
一酌蘭溪遺萬事  
時看牆底卧長瓶

偶得蘭溪十餘樽  
清醇馥烈殆不可

名

又

一榼蘭溪自獻酬  
徂年不肯為人留  
巴山頻入初寒夢  
江月偏供獨夜愁  
越石壯心雞喔喔  
子卿歸信雁悠悠

天生我輩初何用病骨支離又過秋

冬夜作短歌

飢鼠窺殘燈寒犬踏枯葉小室擁燎爐清笳下危堞  
老人素多疾舉動常畏怯衣裘視寒煖日夜自調燮  
食必按本草下箸未嘗輒體安疾自去藥石無此捷  
敢學李輕車霸亭夜遊獵況如馬新息萬里聽鳶跼  
欲求神氣佳先戒事物接寧為子光瘖不效晉夫喋  
明晨一杯粥趺坐橫白氎無魚何足道為爾歌長缺



病愈

倦榻呻吟每自哀占著來告

一作吉

出餘災自能洗研拂

書几時亦折花尋酒杯久類寒蛟潛岫穴忽如老馬噴  
風埃霜晴爛熳東窗日一笑山坡訪早梅

自遣

枳籬茅屋枕孤峰偃盡初來手種松睡少未成千里夢  
愁深先怯五更鐘中天日月逢真主數畝桑麻伴老農  
世事古今誰料得不堪陂水照衰容

感舊

君不見資中名士有李石八月秋濤供筆力初為博士  
不暖席晚補臺郎俄復斥諸公熟睨亦太息摧壓至死  
終不惜生前何曾一錢直沒後遺文價金璧後之視今  
猶視昔此事誠非一朝夕山城舊廬暗荆棘羸然諸孫  
守墳籍撫孤我負朋友責萬里詩成淚空滴

又

君不見蜀師渾甫字伯渾半生高卧蠶頤村才不得施

道則尊死已骨朽名猶存文章落筆數千言上友離騷  
下招魂望之眉宇何軒軒高談浩若洪河翻范尹敬如  
綺與園方飾羔雁登衡門小人謗傷實不根妄指拱壁  
求瑕痕窮通在公豈足論浮雲終散朝陽暎安得此老  
起九原入贊國論蘇黎元

范至能帥成都欲以遺逸起之幙客有沮之者遂不果

寒雨中偶賦

鬢毛蕭颯齒根浮徂歲翩翩肯暫留窮巷多泥誰問疾  
空堦滴雨又經秋自營可笑誇三窟善守寧須築百樓

但使胸中機事盡一樽隨處送悠悠

又

莫年心事與誰同到處飄然一病翁  
斷夢淒涼燈影裏殘詩零落雨聲中  
莫驚顏鬢渾非昨略數朋儕已半空  
祠祿上還猶負媿何功班綴冠僊蓬

予官視  
祕書監

壽考如富貴

壽考如富貴初亦不自知邂逅偶不死亦或至期頤予  
少多疾恙五十已遽衰齒搖頷鬚白蕭然蒲柳姿俛仰

忽二紀卧病實半之富貴不可求壽亦豈汝私萬事付  
自然孰為樂與悲惟當老益學易簣以為期

午飯

我望天公本自廉身閑飯足敢求蕪破裘負日郊簷底  
一碗藜羹似蜜甜

又

民窮豐歲或無食此事昔聞今見之吾儕飯飽更念肉  
不待人嘲應自知

題王仲信畫水石橫幅

王郎書逼揚風子畫亦憑陵蜀雨孫豈是天公憎絕執  
一生憔悴向衡門

治圃

槁蔓殘蕪滿幽圃多具鉏耰課僮豎非惟吾圃要剪除  
亦恐爾輩成惰窳老桂盤壑飽風霜修篁當軒弄煙雨  
一松孤立信豪傑兩槐對植如賓主珍禽揀枝春欲動  
蠹穴掃空吾甚武靡蕪芽蘖已暗長甘菊根芽亦潛吐

山薑澗蒲乃微草露葉參差看仰俯世間安得有遺才  
位置要須令得所

冬日感興十韻

霧雨天昏曠陂湖地阻深蔽空鴉作陣暗路棘成林有  
客風埃裏頻年老病侵夢魂來二豎相法欠三壬舊憤  
開孤劒新愁感斷砧唐衢惟痛哭莊舄正悲吟瘦跨秋  
門馬寒生夜店衾但思金舊壁敢冀訪遺簪樓上蒼茫  
眼燈前破碎心長謠傾濁酒慷慨壓層陰

冬日出遊十韻

吳會寒常薄，冬深略未冰。  
荒郊觀雉鬪，大澤見魚騰。  
釣艇頻容借，籃輿漸可乘。  
有時穿密篠，隨處倚枯藤。  
金石秦遺刻，衣冠禹舊陵。  
叢祠祈臘雪，小市試春燈。  
問路鉏畬叟，爭橋乞供僧。  
疎狂違俗久，衰疾與年增。  
干祿雖知恥，懸車媿未能。  
階官有微俸，醉髮任翳鬢。

思蜀

園廬已卜錦城東，乘驛歸來更得窮。  
只道驂騑開道路，



豈知魚鳥困池籠石犀祠下春波綠金雁橋邊夜燭紅  
未死舊遊如可繼典衣猶擬醉耶筒

又

二十年前客錦城酒徒詩社盡豪英才名吏部傾朝野

意氣成州共死生

吏部郎字文紹奕袞自成州守字文子震子友

廢苑探梅常

共醉遺祠訪柏亦俱行即今病卧寒燈裏欲話當時涕

已傾

又

譚侯才氣敵文園

國子監丞譚季壬德稱

日日銀鞍畫戟門奇句

入神聞鬼泣巨觥如海看鯨吞一官曹監能令死萬里  
銘旌忍更論湖上秋來頻入夢憑誰詞翰與招魂

作雪

雪雲寒不動林鳥噤無聲病起衰何劇囊空醉不成中  
原亂方作弱敵運將平臺省多賢俊常談媿老生

又

荒村雪欲作耄叟病無聊樹暝烏鳶集茆深雉兔驕溪

灘觀趁渡嶺路數歸樵即死無他憾終身負聖朝

戲詠山家食品

牛乳抨酥瀹茗芽  
蠶房分蜜漬棕花  
舊知石芥真尤物  
晚得萋蒿又一家  
疎索鄉鄰緣老病  
團藥兒女且喧譁  
古人不下藜羹糲  
斟酌龜堂已太奢

耕罷偶書

新溉東臯畝一鍾  
烏犍麤足事春農  
灞橋風雪吟雖苦  
杜曲桑麻興本濃  
老大斷非金谷友  
生存惟冀酒泉封

莫嘲野餉蕭條甚箭茁蓴絲亦粗

一作供且

### 雨夜

末路蕭條客子心不堪徂歲更沉陰  
低簷雨滴睡眠少敗壁燈殘感慨深  
不辦典衣謀盡醉尚能擁鼻作微吟  
交朋一散如天遠試向今宵夢裏尋

### 菴中晨起書觸目

山重水複怯朝寒一卷窗間袖手看  
朱檐長瓶列雲液絳囊細字拆龍團  
數峰移自侏儒國一研來從黯淡灘

要識放翁頑鈍處胸中七澤著猶寬

雲液揚州酒名近淮帥餉數十尊營

道小山及劔硯得自張季長張仲欽適在案間

又

暉暉初日上簾鉤漠漠清寒透衲裘雪棘並棲雙鵲暝

金環斜絆一猿愁廉宣卧壑松楠老王子穿林水石幽

戲事自憐除未盡此生行欲散風漚

唐希雅畫鵲易元吉畫猿廉宣仲老

木王仲信水石皆菴中所挂小軸

又

賦形不使面團團聳膊心知到骨寒晏子元非枕鼓士  
杜生那有切雲冠時扶遷客桄榔杖日厭詩人苜蓿盤  
賴是平生憎阿堵今年初解待祠官

又

初歸誓墓老鄉邦手結茆茨近小江北渚露霑行藥屐  
東廂日射勘書窗孤忠自信丹心折萬事空成雪鬢雙  
長媿宗人白崖老贈行期我鹿門龐  
予自成都召還禱射洪白崖陸使君  
祠使君以杜詩為籤予  
得全家隱鹿門之篇

三山杜門作歌

我生學步逢喪亂家在中原厭犇竄淮邊夜聞敵馬嘶  
跳去不待雞號旦人懷一甓草間伏往往經旬不炊爨  
嗚呼亂定百口俱得全孰為此者寧非天

又

高宗下詔傳神器嗣皇御殿猶揮涕當時獲綴鵷鷺行  
百寮拜舞皆歔歔小臣疎賤亦何取即日趨召登丹陛  
嗚呼橋山歲晚松柏寒殺身從死豈所難

又

中歲遠遊踰劍閣青衫誤入征西幙南沮水邊秋射虎  
大散關頭夜聞角畫策雖工不見用悲吒那復從軍樂  
嗚呼人生難料老更窮麥野桑村白髮翁

又

晚入南宮典牋奏濫陪太史牛馬走忽然名在白簡中  
一擢還家傾臘酒十年光陰如電電綠蓑黃犢從鄰叟  
嗚呼古來骯髒例倚門況我本自安邱園



又

寬恩四賦仙祠祿每忍慙顏救枵腹五秉初辭官粟紅  
一瓢自酌巖泉綠天公乘除不負汝宿疾微平歲中熟  
嗚呼字字細讀逍遙篇此去八十有幾年

老境

白髮短欲盡人嗤心尚孩埋盆池漱灑累瓦塢崔嵬輒  
飯三春米醇醪九醞醅忽然拈筆起記著早梅開

又

今日霜殊重衰翁老可憐朝晡兩炊火覆藉一牀氊人  
客容稱疾兒童不攪眠雲開見殘日更愛小窗妍

記戊午十一月二十四夜夢

街南酒樓粲丹碧萬頃湖光照山色我來半醉躡危梯  
坐客驚顧聞飛屐長緇短帽黃絁裘從一山童持藥笈  
近傳老仙嘗過市此翁或是那可識逡巡相語或稽首  
爭獻名樽冀餘瀝我欲自言度不聽亦復軒然為專席  
高談方縱驚四座不覺隣雞呼夢破人生自欺多類此

撫枕長謠識吾過

六經示兒子

六經如日月萬世固長懸學不趨卑近人誰非聖賢馬  
能龍作友蝸乃氣為天我老空追悔兒無棄壯年

舍北晚步

漠漠炊煙村遠近萋萋儻鼓埭西東三叉古路殘蕪裏  
一曲清江淡靄中外物已忘如棄屣老身無伴等羈鴻  
天寒寂寞籬門晚又見浮生一歲窮

對酒

老子不堪塵世勞且當痛飲讀離騷此身幸已免虎口  
有手但能持蟹螯牛角挂書何足問虎頭食肉亦非豪  
天寒欲與人同醉安得長江化濁醪

夜坐求酒已盡喟然有賦

澹月微霜夜漏徂披裘不睡附寒爐清笳嫋嫋已三弄  
殘火熒熒纔一銖報國無期心欲折讀書自力眼將枯  
麴生作態年來甚不受閑人折簡呼

食粥

張文潛有食粥說謂食粥可以延年予竊愛之

世人箇箇學長年不悟長年在目前我得宛邱平易法  
只將食粥致神仙

寒夜

堅冰塞川厚莫測斷雁叫羣聲可哀草園小甕酒未熟  
霜壓瘦枝梅不開穉子忍寒守蠹簡老夫忘睡畫爐灰  
低頭就世吾所諱千載伯鸞安在哉

梅花

五十年間萬事非  
放翁依舊掩柴扉  
相從不厭閒風月  
只有梅花與釣磯

又

山村梅開處處香  
醉插烏巾舞道傍  
飲酒得仙陶令達  
愛花欲死杜陵狂

又

一花兩花春信回  
南枝北枝風日催  
爛熳却愁零落近  
丁寧且莫十分開

又

廣寒宮中第一仙情深不得韻超然勸君莫作兒女態  
但向花前傾玉船

又

秭歸江頭煙雨昏客舟夜繫梅花村相逢萬里各羈旅  
不待猿啼已斷魂

又

青羊宮前錦江路曾為梅花醉十年豈知今日尋香處

却是山陰雪夜船

三山卜居今三十有三年矣屋陋甚而地有餘數  
世之後當自成一村今日病少間作詩以示後  
人

印累累綬若若換君朱顏君不覺冠如箕劒挂頤蒼頭  
廬兒笑君癡不如短褐歸鄉舍上畢租庸下婚嫁橫陂  
引水蒔禾黍高陸犁荒種桑柘比鄰畢出觀夜場老稚  
相呼作春社雞爭舂米茅簷底犬吠行人槿籬罅數椽



幸可傳子孫此地他年名陸村藜羹一飽能世守殊勝  
養牛并上尊

又

再見封侯未為快一擲成盧安用再世間得意固多矣  
堪笑窮人事常敗我生出仕四十年寸進恰如船上埭  
即今卧病茅簷裏回首窮通竟何在荆山之下玉抵鵲  
兩京春薺論斤賣蘇秦煌煌佩六印尼父栖栖厄陳蔡  
玄傑美官輒見思東野出門常有碍躬耕至老豈不佳

子孫當以吾為戒

南園觀梅

小嶺清陂寂寞中  
綠樽歲晚與君同  
高標賴有詩人識  
絕艷真窮造物工  
正喜參差橫夜月  
又驚零落付春風  
老諳世事寧多歎  
身自人間一轉蓬

歲盡苦寒

曉寒無賴透重裘  
三日江雲暝不收  
歲月推移吾輩老  
交朋零落此生浮  
東臯苦潦猶中熟  
舊疾雖存亦小瘳

禹廟蘭亭俱在眼  
剩沽春酒破春愁

己未新歲

饒歲愁雖劇  
迎年喜亦深  
桃符帶草寫  
椒酒過花斟  
車馬久無迹  
兒孫聊慰心  
更欣春意早  
處處有鳴禽

歲首書事

東風入律寒猶劇  
多稼占祥雪欲成

雲陰作雪彌旬至  
開歲雪意愈濃明

日戌初立春猶  
可為臘雪也

鬱壘自書誇腕力  
屠蘇不至歎人情

今歲

無餽屠蘇者

呼盧院落譁新歲

鄉俗歲夕聚博  
謂之試年庚

賣困兒童起

五更

立春未明相呼賣  
春困亦舊俗也

白髮滿頭能且健  
剌隨鄰曲樂

昇平

又

扶持又度改年時  
耄齒侵尋敢自期  
中夕祭餘分餽飫

鄉俗以夜分畢祭享長幼共飯其餘又  
歲日必用湯餅謂之冬餽餽年餽飫

黎明人起換鍾

爐春盤未抹青絲菜

今年正月  
二日立春

壽尊先酬白髮兒  
聞道

城中燈絕好出門  
無日歎吾衰

客來多言府中今  
歲上元燈甚盛

初春

元日人日來聯翩轉頭又見試燈天且欣一雪壓災瘴  
不怕連陰咽管絃陌上漸多酤酒舍岸邊初理下湖船  
紫姑擬卜元無事只問今春幾醉眠

菴中獨居感懷

身愈龍鍾髮愈稀流年冉冉迫殘暉讀書十紙勤雖在  
上樹千回事已非仗馬曾鳴宜取斥牧羝雖乳亦忘歸  
餘生自笑知何似萬里遼天老令威

又

自閉菴門不點燈  
情耕村叟罷參僧  
一生已是膠黏日  
投老安能夏造冰  
頑面敢辭乾汝唾  
蔬餐聊得曲吾肱  
高春睡熟無多笑  
那有禪師解放鷹

又

無錢溪女亦留魚  
有雨東家每借驢  
藜粥數匙晨壓藥  
松肪一椀夜觀書  
黃紬被暖閒無厭  
白布衫長樂有餘  
南陌東阡春事動  
放翁作計未全疎

戲作貧詩

垂老貧彌甚虛教遇太平竈閒無馬穴釜冷有魚生  
妾病常停織兒飢屢輟耕癡頑惟此老未廢浩歌聲

又

左券頻稱貸西成少蓋藏苦飢炊稻種緣病賣桑黃  
土焙憐煙煖藜羹愛糝香君看首陽叟窮死亦何傷

春日園中作

杏花開過尚輕寒盡日無人獨倚闌久別名山憑夢到  
每思舊友取書看塵埃幸已賒腰折富貴深知欠面團

老去逢春都有幾一杯行復送春殘

中春連日得雨雷亦應候

誰言白首意低摧老子逢春亦樂哉  
犁畔方吹社公雨  
壠頭又轉阿香雷  
睡餘支枕聽鶯語  
醉裏題窗記燕來  
更有山家堪喜事  
吾孫上樹欲千回

德孫幼病足今  
已行步健甚

雨後微陰光景益奇復得長句

結轍軒車已掃空  
揮犀談笑與誰同  
日消淺醉閒吟裏  
春在輕陰薄靄中  
百尺遊絲喜風定  
一雙新燕說泥融



天工只費須臾力開遍東闌半丈紅

春日小園雜賦

久矣雲霄鍛羽翰小園聊得賦春寒

魯望有春寒賦

風生鴨綠

紋如織露染猩紅色未乾不向山邱歎零落且從兒女

話團藥人言麥信春來好湯餅今年慮已寬

又

市塵不到放翁家繞麥穿桑野徑斜夜雨長深三尺水

曉寒留得一分花悶從鄰舍分春氣閒就僧窗試露芽

自此年光應更好日驅秧馬聽縑車

簡鄰里

今年意味報君知屬疾雖頻未苦衰獨坐空齋如自訟

三舍法行時嘗上書言  
事者屏置一齋曰自訟

小鑄殘俸類分司

樂天詩猶被  
妻孥教漸退

莫求致仕  
且分司

閒撐野艇漁蓑濕亂插山花醉帽歌有興行

歌便終日逢人那識我為誰

客叩門多不能接往往獨坐至晚戲作

貧舍久疎羅酒漿客來不復倒衣裳官情已盡詩情在

世味無餘睡味長紅練帶飛穿柳去錦熏籠暖撲簾香  
蕭然自笑渾無事漁唱聲中又夕陽

園中偶題

綠衣粲粲味微丹映葉穿枝立畫欄莫戀主人驚不去  
五陵年少有金丸

又

春深無處不春風數樹桃花乃爾紅鶯蝶紛紛自常事  
不應也著白頭翁

禽名

又

憶向彭州取牡丹  
蠟封馳騎露初乾  
如今歷盡人間事  
縱有姚黃亦嬾看

又

九日春陰一日晴  
不堪風駕浪花生  
畫船欲解還歸卧  
寂寂窗扉聽鳥聲

北窗偶題

兩叢香百合  
一架粉長春  
堪笑龜堂老  
歡然不記貧

又

曉晴林鵲喜晝暖蜜蜂喧我老詩情盡逢春亦一言

又

簾外燕翩翩歸時在社前不辭飛渡海來看賽豐年

又

煙波兩鷓鴣肯為放翁來菰米猶能給蒼顏得屢開


沈園

城上斜陽畫角哀沈園非復舊池臺傷心橋下春波綠

曾是驚鴻照影來

又

夢斷香消四十年  
沈園柳老不吹綿  
此身行作稽山土  
猶弔遺蹤一泫然



劔南詩藁卷三十八